

TE HEHEURAA API

»»»»»
ATETE 1940

TE TAHI MAU PARAU RII NO NIA IA'U IHO

Eaha o vau nei.

No roto vau i te hoê amuiraa tane e te vahine tei tae i te piti tauatini i te rahiraa. Te rahiraa o matou nei, e feia apî iho â ia, e no matou iho te huaaro i te horoa i te tahi mau matahiti o to matou oraraa nei, no te raveraa i te ohipa misionare.

No te mea e ere au no roto mai i te hoê haapiiraa teitei no te ohipa evanelia, e ere ia vau i te hoê orometua tumu. No roto mai au i te hoê nunaa huru rahi o tei haapiihia, mai to ratou apîraa mai, te mau parau tumu no te faaroo, e no reira, ua tia ia ratou ia parau haere i te parau no to ratou faaroo, e ia paruru'atoa'tu.

Ia parahi au i to'u iho fenua, e noaa ta'u iho faufaa na roto i te raveraa i ta'u iho ohipa tumu mau.

To'u tiamâraa, ei taata noa nei e ei orometua, na paturuhia ia e te hau no reira mai au, na roto i to'na horoaraa mai ia'u, e i to'u mau hoa atoa, i te parau faatia ia haere e ia rave i te ohipa ta'u i mana'o i te rave. Te nunaa no reira mai au, tei tae i te hanere o te matahiti i teie nei, e roo viivii ore to'na no nia i te faaturaraa i te ture fenua, e te ture morare atoa.

Eaha ta'u e rave nei.

Na roto i to'u maitiraahia, e te mau taata faatere o ta'u Ekalesia, ua faarue au, ma to'u iho hinaaro, i ta'u raveraa ohipa no te raveraa i te ohipa pororaa evanelia no na matahiti e piti e tiahapa, i te tahi mau taime, ma te farii ore i te hoê moni no te reira, e ma te amu i ta'u iho moni; e te na reira nei au no te haaparareraa i te Parau Mau mure ore, mai

te au i to'u iho mana'oraa. O te mea ta'u e rave nei i teie nei, ua rave-atoa-hia e te ahururaa tauatini taata e rave rahi o to'u mau hoa faaroo, i roto i teie na hanere matahiti i mairi a'enei. Ua riro matou ei pūpū rahi roa a'e, i teie nei ao, no te orometua ma te moni ore.

Ia oti ana'e ta'u mau pororaa evanelia e ho'i faahou ia vau i to'u iho fenua, no te rave faahou i ta'u iho ohipa e tae noa'tu i te taime e titau-faahou-hia vau no te tahi atu tere misionare. O te reira ia te huru o te raveraa i roto i ta matou nei Ekalesia. No reira ua riro to'u mau hoa faaroo ei feia ratere rahi, e ua tia ia ratou ia faaau, ia ratou iho, i te mau peu o te mau fenua ta ratou e parahi ra, e tei ia ratou atoa te mau peu maitai atoa.

No to'u oraraa.

E mea na roto i to matou amuraa i te moni ta matou iho i haaputu, e a ore râ, te moni e haponohia mai e to matou mau metua, e to matou atoa mau hoa, i tia'i ia matou ia horoa i to matou taime, e i ta matou moni no to matou tau i roto i te misioni.

Eaha te huru o te ohipa i ravehia, e te tahi mau vahine i-vi, no te tautururaa i ta ratou mau tamarii tei haere i te misioni! Eaha te huru o te mau ohipa i imihia, e te tahi mau vahine, no te tautururaa'tu i ta ratou mau tane tei tono-haerehia ia poro i te evanelia! Eaha te huru o te mau tusia tei fariihia, e te mau metua, te mau taeae e te mau tuahine!

Area râ, ua ravehia teie mau tusia ma te oaoa, e aita ratou i haaveve noa'tu i te hoê taata. E faatae mai te tusia i te haamaitairaa.

Te mau tumu i rave ai au i te reira ohipa.

O tana reo iti ra i roto ia'u tei turai ia'u ia rave i tana ohipa rahi pororaa evanelia, e horoa mai oia i na papuraa e toru i raro nei:

1. E mea faufaa rahi ta'u faaiteraa: E faatae oia i te parau mau i te mau taata atoa o te ao nei, e eiaha i te tahi ana'e mau taata.

2. E tia i ta'u faaiteraa ia haamaitai rahi roa i to te ao atoa nei. Mai te mea e farii te ao nei, e ia faarave ia'na i te ohipa, e rahi roa ia to'na maitai, i raro nei e i nia atoa i te ra'i.

3. Ia tauturu atu i to'u mau taata-tupu, ma te nounou ore, ia ite e ia pee i te e'a te aratai i te oaoa o te mau mahana atoa, o te reira ia te hoê ohipa na'u, no te pae faaroo, o te faatae atoa mai ia'u iho i te oaoa hopea ore.

Ta'u faaiteraa.

Te hora'tu nei au i te hoê parau paari, no te oraraa o te tino e no te varua, o te riro ei maitai no te tino e no te varua atoa, e tei faariro i te mau ohiparaa e te oraraa nei ei mau mea oaoa. Na roto i taua parau paari ra e tia ia noaa mai te hoê oraraa maitai a'e, te maitai pae tino rahi a'e, e te hoê morare rahi a'e. Te parau mau, i te pae o te paari e te pae o te faaroo, o te tumu mau ia o ta'u faaiteraa, o tei amui, tei faaan, i roto i te ravea hoê, i te mau mea atoa tei vai i roto i te parau mau no te mau faaroo atoa, te mau ekalesia, e te mau ite hohonu atoa o te ao nei. Te ite nei ta'u nei parau faaite i te parau mau, te haapii nei i te reira, e te paruru atoa ra i te reira.

O te hoê ia haapaoraa faaroo tei au maitai i to tatou nei tau maramarama, mai te faaite atu i te mau tutavaraa o te taata nei i te e'a te au ia tatou ia rave, ta'u e horoa'tu nei, oia hoi, te hoê haapaoraa faaroo ora, o te tia ia'na ia faaoti i te mau parau paari atoa o te oraraa nei, te hoê haapaoraa faaroo tei arataihia e to'na iho mau melo, eiaha râ te hoê pūpū orometua.

Te haapii nei au e, te vai nei te reira ora i roto i te Ekalesia tei faatiahia e te Mesia iho.

Te faaite papu nei au e, ua faatiahia te Ekalesia a Iesu Mesia i roto i to'na huru matamua, hoê hanere matahiti e tia-hapa i mairi a'enei, ua roto i te heheuraa no ô mai i te Atua, i raro a'e i te i'oa ra te Ekalesia a Iesu Mesia i te Feia Mo'a i te Mau Mahana Hopea Nei, e ua horoa-atoa-hia mai ia'na te mana mau no te Autahu'araa Mo'a.

Hoê hanere a'enei matahiti to te mau parau tuatapapa o taua Ekalesia ra faaiteraa mai i te parau mau e te ora o taua Ekalesia ra. Noa'tu e, ua rahi te mau vahi ta'na i tuu i te ture o te fenua, ia noaa te tiamâ o to'na mau melo, ua noaa i te Ekalesia a Iesu Mesia te hoê tiaraa rahi i te ao nei. Ua rave rahi te oire tei patuhia e ana, ua riro oia ei fatu no te hoê medebara, na faatae mai oia i te faufaa, te oaoa e te ora o te varua, tei vai i roto i to'na mau melo, i te mau fenua atoa o te ao nei. Ua riro to'na mau oire ei mea itoito, te oaoa e te faufaa hoi.

I te faatia-faahou-raa-hia o te Ekalesia, ua faaue mai te Atua ia faaitehia, i te mau taata atoa o te ao nei, te opuaraa rahi o te ora mure ore.

Te huru o ta'u raveraa ohipa.

No te faaiteraa i ta'u parau faaite, te rave nei au i te mau

peu maitai atoa. Te haere nei au i te mau utuafare atoa no te faaiteraa'tu, i tei hinaaro, i te mau parau mau o te Evanelia. E parau atu vau i te reira, ia ratou, na roto i te parau vaha, e a ore râ, te horoaraa'tu i te tahi mau buka rii. E o-rero atoa vau i nia i te mau aroa, i te mau vahi atoa ua faa-tiahia vau ia na reira. E faaite au, e e tatara vau, ma te tan-turu o te tahi mau parau, i te mau maitai no te evanelia. Te tuu atoa nei au i te tahi mau parau na roto i te mau ve'a i te taime ua tia ia'u ia na reira. Mai te au i to'n iteraa i te fau-faa o ta'u nei parau faaite, eita roa vau e vaiiho i te hoê noa a'e ravea no te haaparareraa i te reira.

Eita roa vau e mârô atu i te parau i te mau orometua no te hoê noa'e haapaoraa, te faatura nei au i te tia o te taata ia maiti i te mea ta'na i hinaaro mai te au i to'na hinaaro, te hinaaro nei au, ma te tuutuu ore, i te imi i te mau ravea atoa i te taime e au no te faaiteraa'tu i ta'u parau faaite i te mau taata atoa te tia ia ratou ia ite i te reira, te tane e te va-bine atoa hoi.

E faatia vau i te mârôraa parau, ia na roto râ ia i te mârû e te au maitai.

Ta'u tiaororaa.

Te ani atu nei au i te mau taata atoa, eiaha roa ratou e haamoe e, e haavare ana'e te mau parau faaino tei papai-hia no nia i te Feia Mo'a no te Mau Mahana Hopea Nei, tei parau-noa-hia te mau Moromona, no te mea ua varavara te vahi, i roto i te ao nei, tei haere-mataitai-hia mai te puha-paraa tumu o te Ekalesia a Iesu Mesia i te Feia Mo'a i te Mau Mahana Hopea Nei. Te reira mau faaino faufaa ore, o tei haapeapea rii i te Ekalesia, eiaha ratou ia riro ei faatau-pupu i te mau taata maitai ia ite ratou iho i te haavare ore o to matou nei faaroo, e eiaha atoa e tapea ia ratou ia ore ra-tou ia faaroo mai ia maton, e ia feruri i nia i ta matou parau faaite. Ua parau mai Paulo: "*A tamata i te mau mea aton e a tapea i te mea maitai.*"

E oaoa roa vau ia horoa, i te taata tei hinaaro, i te mau ha-amaramaramaraa atoa ta ratou e hinaaro no nia i te mau haapiiraa a te Ekalesia a Iesu Mesia i te Feia Mo'a i te Mau Mahana Hopea Nei.

O te mau parau ia ta'u e hinaaro nei i te faaite no nia ia'u iho.

*Papaihia e Ioane A. Widtsoe, te hoê Aposetolo
Faaauhia ei reo Tahiti e Marcel Bonnet*

EDITORIALE

TE faaroo aore e ohipa ra, e faaroo pohe ia. Te na reira mai nei Iakabo. Te mârô mai nei râ Paulo e, e ere te ora i to te ohipa, *aita'tura o te taata nei e te teoraa.* E parau mau roa na parau e piti. Eaha ra te ravea e au ai te hoê i te tahi? Te parau nei te hoê pae faaroo e, na roto i te mau oro'a e ora'i te taata, noa'tu e faaroo to'na, e a ore râ, *aita.* Te parau nei râ te tahi pae faaroo e, na roto i te faaroo e te fa'iraa i te Mesia e ora'i te taata, noa'tu te huru o ta'na ohipa.

E ora anei te taata na roto i te hoê raveraa maere, na roto noa i te bapetizoraa e a ore râ te fa'iraa i te Mesia? Eaha te ora? E ere ia i te hoê ohipa e oti oioi noa. E faatiamâraa ia i te aan taata i te mau ino atoa, o te haavîraa ia i te mau ino atoa o te ao nei. Oia hoi, o te riroraa ia o te taata ei Cherisiano mau na roto i te mana o Iesu.

Ua hi'o Paulo i te ati Iuda, i te huru no ta ratou mau ohipa, ua ite oia e, te rave noa ra ratou i te ohipa mai te faaroo ore, e ua faaite oia ia ratou e, e ore e noaa te ora na roto i teie huru ohipa. Mai te faaroo aore e ohipa, oia atoa te ohipa aore e faaroo: e mea pohe ia. Na roto râ i te maitai e te aroha o te Mesia e roaa ia tatou te faaroo ora, e no te reira tatou e rave ai i te ohipa maitai.

Ua roaa i te hoê raatira faehau toroa teitei te hoê Buka a Moromona. I te hopea o na hebedoma e piti ua hope teie buka i te tai'ohia. Ua tae atura na orometua io teie taata, e ua parau maira oia e, *E parau mau teie buka. A tahi nei au i farii mai ai i te parau haamaramarama no te pae varua mai teie te huru! Na teie buka i faahuru ê to'u oraraa. Mai to'u tai'oraa i te reira mai â, aita i nehenehe ia'u ia inu i te ava faataero.*

Te ite nei tatou i roto i teie e, ua faahuru-ê-hia te oraraa no teie taata. Eaha te tumu? No to'na faaroo i te Mesia. No hea mai taua faaroo ra? No roto mai i te Buka a Moromona. E mea nahea te roaraa mai o te Buka? Na roto ia i te aroha o te Mesia i horoahia mai i to tatou anotau.

No reira, ia apitihia te faaroo ora i te ohipa ora, e faatia-hia te parau mo'a, e roaa mai ai te ora.

R. Ioane Richards

atoa no
Evane-
e parau
i. E o.
ua faa-
te tau-
lia. Te
re'a i te
te fau-
i te hoê

ometua
te taata
inaaro,
u ravea
aite i te
e te va-
i te mǎ-

oa ratou
i papai-
Nei, tei
avara te
te puha-
o'a i te
a ore, o
faatau-
vare ore
a ore ra-
ou parau
ea aton

man ha-
man haa-
te Man
nia ia'u

Aposetolo
Bonnet

TE PARAU AUTAHU'ARAA

No te Ava'e SETEPA

TE MAU TAATA TUIROO O TE BIBILIA

E MAU UIRAA

1. O vai teie taata? 2. Eaha to'na toro'a? 3. Eaha te huru o to'na maitiraahia? 4. I hea ta'na ohipa i ravehia'i? 5. Eaha te ohipa i oti ia'na? 6. Ua mauruuru anei te mau taata ia'na? 7. Ua mauruuru anei te Atua ia'na? 8. E manuia anei tatou ia pee tatou ia'na? A tara mai.

Setepa 1. MATATIA. Te Ohipa 1:15-26.

Setepa 8. SETEPHANO. Te Ohipa 6:5, 8-15; 7:2-60; 8:2; 11:19; 22:20.

Setepa 15. BARANABA. Te Ohipa 4:36, 37; 9:27; 11:22-30; 12:35; 13; 14; 15; I Korinetia 9:6; Galatia 2:1, 9, 13; Kolosa 4:10; 14:4, 14.

Setepa 22. TIRO. Galatia 2:1; II Korinetia 7:6, 7, 13, 15; 8:4-7; Tito 1:4, 5; 3:12; II Timoteo 4:10.

Setepa 29. A haapii atu i te parau no na Haapii Hahaere no te ava'e i mua, mai tei papaihia i roto i te ve'a no te ava'e Setepa.

Na Te Mau Maapii

Mahaere na te Mau Utuafare

TE MAHANA HAAPAERAA MAA

Te anihia nei te Feia Mo'a na roto i te mana o te Autahu'araa, o tei faatere ia ratou, ia faariro ratou i te Sabati matamua no te mau ava'e atoa ei mahana haapaeraa maa. E faaterehia te pureraa no te haapaeraa maa i taua mahana ra, e tairuru te Feia Mo'a i reira, no te haapaeraa i te maa, no te pureraa, e no te faaiteraa, i mua i te Fatu, i To'na haamaitairaa ia ratou. Te hinaarohia nei ia haapao te melo atoa no te Ekalesia i te haapaeraa maa.

Te haapaeraa maa i parauhia i roto i te Bibilia, mai te mairiraa ia o te mahana e tae noa' tu i te mairi-faahou-raa o te mahana. E mauruuru iho a te Fatu i te reira huru haapaeraa maa; na te Peresideniraa ra o Ta'na Ekalesia i faaite i te mau melo atoa e, mai te mea eita ratou e haapae i te maa no te taataraa o taua taime ra, e mea tia roa ia ia vaiihohia na tamaaraa e piti i te Sabati matamua no te mau ava'e atoa.

Ia inu tatou i te pape ei faaoreraa i te hiaai i te maa, e ere ia i te haapaeraa i te maa, aita ra e peapea ia ravehia te oro'a i te pureraa oro'a.

Na roto i te haapaeraa i te maa, e tupu te hinaaro o te tino i te maa, e paruparu rii te tino, e e tia ia tatou ia haafatata i te Fatu, e ia haamo'e rii ia tatou iho i te haamana'oraa i te feia tei ere i te ho'e mau mea e au na ratou.

TE SOTAIETE VAHINE TAUTURU

No te Ava'e SETEPA

Irava tamau aau: Alama 2: 30

E te Fatu e, e aroha mai e faaora mai ia'u nei, ia riro vau ei mauhaa i roto i to oe rima ia faaora e ia tia i teie nei feia.

Mahana Maha (Matamua)

Mahana iritiraa mana'o e te himene na te mau tuahine.

Parau tumu no na Tuahine Hahaere: Hiroa Faaroo 13: Mai te mea te vai atura te hoê mau mea tia ra, e te mau mea viivii ore ra, e te mau mea popouhia ra, e te mau mea roo maitai ra, e titau maite â ia matou i te reira.

A tai'o i te Philipi 4:8, e a paraparau no nia i taua mau parau ra.

Mahana Maha (Piti)

ALAMA, tamaiti, te hoê o te feia tuiroo o te Buka a Moromona.

O te tamaiti ia a Alama, e te Haava Rahi matamua i nia i te ati Nephi, oia atoa te Tahu'a Rahi i nia i te ekalesia.

1. Te tumu e te huru no to'na maitiraahia ei haava. Moisia, pene 29.

2. Te huru no to Alama haavaraa. Alama, pene 1.

Mahana Maha (Toru)

1. Ua vaiiho Alama i te toroa Haava Rahi ia Nephiha, a poro ai oia i te tatarahapa i rotopu i to'na feia. Alama 4: 16-20.

a. To'na manuïaraa. Alama 6:1-5.

b. To'na patoiraahia. Alama 8:8-13.

c. To'na parau-maitai-raa-hia e te Fatu. Alama 8:14-17.

2. Te moe-ê-raa o Alama. Alama 45:18, 19.

Mahana Maha (Maha)

E mahana raveraa ohipa na te mau tuahine.

TE HAAPIIRAA SABATI

No te Ava'e SETEPA

PUPU PARAIMERE

Irava tamau aau: *II Samuela 22: 32*

O vai mau te Atua, maori râ o Iehova? e o vai te mato, maori râ o to ta-tou Atua?

Setepa 1. Abasaloma i roto i te raau; Davida i nia i te terono. *II Samuela 17:24 e tae noa'tu i te 20:26.*

Setepa 8. Solomona i nia i te terono a Davida. *I Te Mau Arii 1.*

Setepa 15. Te Arii apî e te paari. *I Te Mau Arii 3:1 e tae noa'tu i te 4:34; II Paraleipomeno 1:1-13.*

Setepa 22. Te mau mahana hopea no te ariiraa o Solomona. *I Te Mau Arii 10:1 e tae noa'tu i te 11:43.*

Setepa 29. Hi'opoaraa.

PUPU PITI

Irava tamau aau: *II Samuela 16: 18*

Eiaha, o ta Iehova ra, e ta teie nei mau taata, e ta Iseraela atoa ra e haapao ra, oia to'u fatu, e ei o na ra vau parahi ai.

Setepa 1. Davida te mätä'u ore i roto i te tama'i. *I Samuela 17.*

Setepa 8. Davida rana o Ionatana. *I Samuela 19; 20; 24.*

Setepa 15. Davida e Ionatana—e taua mau. *I Samuela 18-20; II Samuela 1:17-27.*

Setepa 22. Davida te arii i Iseraela. *II Samuela 9; 16.*

Setepa 29. Hi'opoaraa.

PUPU TORU e te MAHA

Irava tamau aau: *Genese 49:24*

Te vai tia ra ta'na fana te etaeta te etaeta, e te puai ra ta'na rima i te mana o te Atua mana o Iakoba ra.

Setepa 1. Iakoba i te tonoraa i ta'na tamarii e hoo i te sitona. *Genese 42.*

Setepa 8. To Iosepha raveraa i to'na mau tuaana. *Genese 43; 44.*

Setepa 15. To Iosepha faaiteraa ia'na iho i to'na mau tuana e te faaitoitōraa ia Iakoba ia haere oia i Ai-phiti. *Genese 45; 46.*

Setepa 22. Iosepha e ta'na mau tamarii i te haereraa'tu ia Iakoba, e to Iosepha poheraa. *Genese 47; 48; 50:22-26.*

Setepa 29. Hi'opoaraa.

TE FEIA API



No te Ava'e SETEPA

Irava tamau aau: *I Korinetia 15:29*

Aore râ, eaha ihora te feia i bapetizohia no te feia i pohe ra, ia ore roa te feia i pohe ra ia tia faahou? eaha ihora ratou i bapetizohia'i no tei pohe ra?

Setepa 1. TE OROA A TE FATU E TO'NA HUNARAAHIA. Mataio 26:3-30, 47-56; Ioane 7:30, 44-53; 11:47-57; 13:18-30; 18:1-14; Mareko 14:22-25, 43-52; Luka 22:19, 20, 47-53.

Setepa 8. TE HAAVARAA E TE FAAUTUARAA. Ioane 18:13, 14, 19-24, 28-38; Mataio 26:57; Mareko 14:53; 15:1-20; Luka 22-54.

Setepa 15. TO IESU POHERAA E TO'NA TANURAAHIA. Mataio 27:31-54; Mareko 15:23-39; Luka 23:33-46; Ioane 19:18-37.

Setepa 22. I ROTOPU I TE MAU VARUA NO TEI POHE. I Petero 3: 18-20; 4:5, 6; Ioane 5:25-29; Isaia 24:21, 22; 42:5-7; Salamo 16:9-11; I Korinetia 15:29; Te Ohipa 10:42; Roma 14:9; Buka a Moromona, Alama 40:11-14.

Setepa 29. Na te orometua haapii e maiti i ta'na iho haapiiraa.

TE HAAPIIRAA PARAIMERE

No te Ava'e SETEPA

Irava tamau aau: *I Korinetia 8:5, 6*

E rave rahi te atua, e rave rahi hoi te fatu mai te reira te huru. Area ia tatou nei hoê roa ia Atua, o te Metua.

MAHANA MAHA (MATAMUA)

Te Hoe Aamu

Ua farerei oia i to'na hoa i nia i te hoê pahi, e ua parapara-rau noa raua, e a tapae ai te pahi ra ani ihora to'na hoa ia haere raua i te fare no te faaotiraa i ta raua paraparauraa e ia tamaa atoa hoi. Ua haere ihora raua, e no te ineine ore, haamata atura raua i te tunu i te maa, e tei reira â raua i te

aniraa o to'na hoa ia'na no te mati e te avaava hoi. Ua faa-ite atura oia i to'na hoa e, aita a'u e mati, aore hoi e avaava, e e ere roa vau i te taata puhipuhi i te avaava. Maere ihora to'na hoa i te huru no ta'na mau parau e ua ui mai e, "No te aha aita oe i puhipuhi i te avaava? E mea varavara te taata i teie nei tau o tei ere i te reira pen."

Ua ata rii oia a pahono ai e, "E hoa, teie ia te tumu, ua ri'ari'a roa vau ia riro to'u nei tino mai te au i teie nei fare." Aita iho â e pahonora ta to'na hoa, no te mea ia nânâ oia i to'na mata i nia, ite ihora oia i te auauahi no te umu tutui-apî-hia i te haereraa i nia, e no reira i ereere roa'i te aroaro o te fare.

MAHANA MAHA (PITI)

Te Tumu i Avaava'i te Miti

I mutaa ihora te vai ra te hoe tamaiti paari, i te fenua Asia. E na roto i to'na ite hohonu i hamani ai oia i te hoê tavoriraa o tei hamani i te mau mea atoa ta'na i hinaaro. Ia parau oia i te tavoriraa, "Kagumagu! tau tavoriraa nainai, a hamani oe i te tihopu!" Ua na reirahia iho â. E mai te mea e, e ani oia i te reira ia hamani i te moni na'na, ua na reira-atoa-hia.

Area râ, te vai ra te hoê parau aro no te faatereraa i te tavoriraa e no te faafaeraa atoa hoi. Mai teie ia te huru: E parau oia i teie parau aro, oia hoi, "Kagumagu! tau tavoriraa nainai, a hamani oe i te faraoa monamona!" Eita te tavoriraa e faaea e tae roa'tu ia parau oia i te hoê parau aro, oia hoi, "Kagumaguore! a faaea tau tavoriraa nainai!" E reira te tavoriraa e faaea'i.

Area, ua taparu te hoê raatira o te tahi pahi ia hoo mai i taua tavoriraa ra na'na. E hoo mai oia i te reira no te hoê moni rahi.

Aita a'era i maoro haere atura taua raatira ra no te hoê tereraa roa i te tahi fenua êê. E i na mahana rii i muri iho i to'na revaraa'tu, pau atura ta'na miti popaa. E no reira i faaue ai oia i ta'na tavoriraa, "Kagumagu! tau tavoriraa nainai, a hamani oe i te miti popaa na'u!" Hamani ihora te tavoriraa i te miti popaa e tae roa'tu ua i roa te pahi i te miti popaa. No te mea, e haamana'oraa poto to'na, ua mo'e ia'na te parau no te faafaeraa i te tavoriraa. E no reira, aita ta'na e ravea maori râ ia rave oia i te tavoriraa e ia taora i te reira i roto i te moana, ia ore te pahi ia tomo. E mai te reira mai â mahana, te tavori noa nei â te tavoriraa i te miti popaa. E te reira te tumu i avaava'i te moana.

MAHANA MAHA (TORU)

Te Tamaiti Paruparu

E mea nainai roa oia e te paruparu hoi. E pae noa iho to'na matahiti. E vahine pua ahū to'na mama e te parahi rā raua i roto i te hoê piha nainai i te hiti o te hoê aroa nainai i roto i te hoê oire rahi.

I te roaraa o te mahana e parahi noa oia i roto i to'na parahiraa, ma te hi'o noa i rapae, na te haamaramarama, i te aroa i raro noa iho. E tia atoa hoi ia'na, ia pi'o rii oia i mua ia ite i te hoê maa vahi iti o te moana o te ra'i, i nia a'e i te mau fare teitei i te tahi pae mai o te aroa. I te tahi mau taime e tere mai te hoê ata i nia i te moana o te ra'i, e i te tahi mau taime o te rehurehu ana'e ta'na e ite.

I te taeraa mai o te tau mahanahana, tae atoa maira te taata faatai hamonia na nia i te mau aroa, e a hi'o noa'tu ai, ua oaoa te mau taata atoa.

E mata oto noa to taua tamaiti ra i te mahana atoa, area rā, ia ite ana'e oia i to'na mama i te haereraa mai e ata ia oia, e e tarape atoa'tu oia ia'na.

I te hoê pô parau atura oia i to'na mama, "Te hinaaro nei au i te tauturu ia oe, e mama, te faarohirohi nei oe, ia oe iho, i te raverā i te ohipa, e aita ta'u e hoê ravea no te tautururaa'tu ia oe na."

Pahono oioi maira oia, "Te na reira nei oe ia'u. E tautururaa rahi no'u ia ite au i to oe na mata iti ia ataata mai oe ia'u na te haamaramarama. E riro ta oe taraperā mai ia'u ei tautururaa no'u. Na te reira e faariro i ta'u ohipa ei mea māmā a'e, e ia mana'o hoi au e, e tarape mai oe ia'u, ia ho'i mai au i te fare nei."

Na ô atura taua tamaiti iti ra, "E tarape puai roa'tu ia vau i teie nei."

(E tuatihia teie aamu i teie mahana maha i mua)

MAHANA MAHA (HOPEA)

Te Tamaiti Paruparu

(E tuatiraa)

I te ahiahi i muri iho, a hi'o ai te hoê taata rave ohipa i te mama i te hi'orā i nia e i te pahonoraā i te taraperā, hi'o atoa'tura oia i nia. Aue tera mata iti ta'na i ite i te pae haamaramarama. Aue rā hoi te oaoa o taua ataata rā! Ataata atoa'tura taua taata rā e tarape atoa'tura. E mea haama rii taua tamaiti iti ra i te pahonoraā mai.

I te poipoirā a'e, turai atura taua taata rave ohipa ra i to'na hoa ma te parau atu ia'na ia hi'o i nia, "I tera tama-

iti iti tei parahi, ma te faaoromai, i te pae haamaramarama," e, inaha, ite-faahou-hia'tura taua ataata oaoa a tarape ai na taupoo e piti ia'na ra.

Haere maira e haere atura te mau mahana, e ua rahi roa'tura te hoa o taua tamaiti ra. Ua tau te mau tane e te mau vahine i to ratou e'a no te haere mai e aroha i taua tamaiti ra. Ua riro atura te oraraa ei mea huru mārū a'e na ratou a haamana'o ai ratou i taua tamaiti iti ra. I te tahi taime, e tae mai te tahi roti ia'na, i te tahi taime, e anani ia, e i te tahi taime, e buka hoho'a ia. E faaea te mau tamarii i te tamai ia ite ratou e, te hi'o maira oia, e i reira e hauti ia ratou i te mau hauti maitai no te faaoaoa ia'na. E oaoa ratou ia ite ratou e, te hinaaro atoa ra oia i te haere mai e hauti e o ratou.

I te hoê ahiahi parau maira te hoê taata rave ohipa, tei rohirohi, i te mama, "A parau atu i te tamaiti e, eita ta matou e nehenehe ia haere faahou mai te mea aita oia. E mea faufaa rahi ia vai te mafatu itoitoe e te here hoi. Na te reira e faaitoitoe ia matou e e haamārū atoa i to matou mau aan. A faaite atu i te reira ia'na."

E e tia ia outou ia tiaturi e, ua na reira iho â oia.

E Haamaitai Outou I Te E'a O Iehova

I TE hoê anotau tahito ua fanauhia te hoê aiū, e ua arataihia, e te hoê fetia, te mau taata paari i te vahia fanauraa o teie nei aiū. Horoa'tura ratou ia'ua i te mau tao'a aroha na'na ra. Ua tupu teie nei aiū i te paari, e ua riro hoi oia ei taata paari, e ei orometua rahi a'e i te ao nei, area rā, no te hoê noa iho ravea a te Atua ia ora te mau taata atoa, i faasataurohia'i oia. Pohe atura, e tia faahou maira oia, oia hoi, te Fatu o Iesu Mesia, te Tamaiti Fanautahi a te Atua. Tae roa mai nei i teie tau hopea nei, te arue e te haamori noa nei te mau taata paari ia'na, e te afai nei ratou i te mau tao'a aroha na'na. Te haapao nei hoi ratou i ta'na mau faanuraa.

Mai te mea e, te haapao nei tatou ia'na, e mea tia ia tatou ia faaineine i to tatou iho oraraa, e te mau mea atoa no to'na tae-piti-raa mai. Ia tai'o tatou i te parau a Ioane Bapetizo i te na ôraa mai e, *E haamaitai outou i te e'a o Iehova, e faatitiaifaro i to'na haerea.* (Mareko 1:3)

E rave rahi te mau irava i roto i te Bibilia tei faaite mai ia tatou e, e tae faahou mai oia no te faautua i te mau taata

mai
taata
Metu
'na r
tei he
nei, i
melai
i te p
vanel
te poi
o to'n
faatei
toa i
rau i

Ma
papu
utua e
maita
atoa o
nia i
mau t
raa ra
i nia i
faahou

Na
te ohia
hoi, t
re ore
i te re
i te fe
opu ato

Te f
Mau M
hia ma
haapa

Ua t
te hoê
ti a te
naha,
ia'u ra
'na ra
te tae
vai ra
E o va

mai te au i ta ratou iho ohipa. *E tae mai hoi te Tamaiti a te taata ma ta'na ra mau melahi atoa, e te hanahana o to'na ra Metua, ei reira oia e faautua mai ai i te taata atoa ia au i ta'na ra ohipa.* (Mataio 16:27) *E teie hoi: Area ia outou i tei hamani-ino-hia ra o te ora ia ta'na e tuu mai no tatou atoa nei, ia fa mai te Fatu ra o Iesu mai te ra'i mai, ma ta'na mau melahi mana atoa ra, ma te auahi ura ra, i te tuuraa mai i te pohe i te feia aore i ite i te Atua, e tei ore i faaroo i te evanelia o to tatou Fatu o Iesu Mesia ra: o te utuahia mai ia i te pohe mure ore mai te aro atu o te Fatu ra, mai te anaana o to'na ra mana; ia tae i te mahana e tae mai ai oia ra, ia faateiteihia oia e to'na ra feia mo'a, e ia umerehia e te feia atoa i faaroo ra.* (Mai ia outou, ua faarookhia hoi ta mutou parau i roto ia outou na.) (II Tesalonia 1:7-10)

Mai te mau parau i faaitehia i na irava i nia nei, ua ite papu roa tatou e, e tae faahou mai Iesu i te ao nei no te faautua e te haava i te mau taata. No reira, a faaineine e a haamaitai i te e'a no to'na ra haereraa mai e tia'i. I te mau tau atoa o te ao nei, hou te tupuraa o te ohipa mai teie te huru i nia i to'na feia, ua tonu Oia i te mau ve'a no te faaara i te mau taata atoa. E na reira faahou anei Oia hou teie haavaraa rahi i tohuhia mai? Ia faatumu taton i to tatou feruriraa i nia i te mau mea i tupu ra, e ite papu tatou e, e na reira faahon Oia.

Na roto i te mau parau papai mo'a ua faaitehia e, e tupu te ohipa faaineineraa na mua i to'na tae-piti-raa mai. Oia hoi, te parau a Ioane no te faaho'iraa mai i te Evanelia mure ore: *Hi'o atura vau i te hoê melahi i te maueraa na ropu i te reva nei: ma te evanelia e tia i te vairaa ra ei pororua'tu i te feia e parahi i te ao nei ra, i te mau fenua atoa, e te mau opu atoa, e te mau reo atoa, e te mau nunaa atoa.* (Apok. 14:6-7)

Te faaroo nei te Ekalesia a Iesu Mesia i te Feia Mo'a i te Mau Mahana Nei, ua tupu teie tufaa, oia hoi, te faaho'iraa-hia mai o te evanelia. E faaararaa rahi teie ia tatou nei ia haapao, e ia faaineine no taua mahana rahi ra.

Ua tohuhia e te peropheta ra o Malaki te haereraa mai o te hoê ve'a no te faaineineraa i te haereraa mai o te Tamaiti a te Atua, ia tae mai Oia ma te hanahana o te Atua: *Inaha, e tonu vau i tau ve'a, e na'na e haamaitai i te e'a i mua ia'u ra; e te Fatu ta outou e imi na, o te tae vave mai ia i to'na ra hiero, te vea a te faufaa ta outou i oaoa na: Inaha, o te tae mai ia, te parau maira Iehova sabaota ra. E tia ra ia vai ra ia faaoromai ia tae i te mahana e haere mai ai oia ra? E o vai te mau ia fa mai oia ra?* (Malaki 3:1, 2)

E tae mai hoi Elia no te tauturu i te faaineineraa: *Inaha, e tono na vau i te peropheta ra ia Elia ia outou na, a tae atu ai i taua mahana rahi mata'u o Iehova ra: ia faafariu oia i te aau o te mau metua e te tamarii, e te aau o te tamarii e to ratou mau metua, o te haere mai hoi au, e o te tairi i te fenua nei i te ino.* (Malaki 4:5,6)

E te tahi ohipa rahi, oia hoi, te haaputuputuraa ia o te feia mo'a, e te tahi atu â mau ohipa. No reira, ua ite tatou i ta tatou ohipa rahi i mua ia tatou nei i teie tau: I te faatia i to tatou iho ora, e i te haamaitai i te e'a o Iehova—*Ia ite te taata atoa i te ora a te Atua.* (Luka 3:6)

Papaihia e Re McEntire

A Faaea, A Mania

U A poiri te pô. Ua rahi te moana. Ua fetoitoi to Iesu Mesia, e ta'na mau aposetolo, pahi i nia i te miti rahi mai te hoê raau nainai. Ua patuhia te pahi e te mau are rahi. I te tahi mau taime e mea fatata te pahi i te faatomohia e te mau are rahi e te mata'i.

Ua taoto Iesu, ma te hau, i te pae i muri o te pahi a farara haere ai te pahi. E ohipa rahi Ta'na i rave i te reira mahana e ua rohirohi Oia. E feruri tatou i te ri'ari'a o To'na mau hoa, hou ratou i faaara'i i te Fatu mai te taoto, mai tera ia te huru, ua mana'o iho â paha ratou e, ua iriti te Atua i To'na tiairaa ia ratou. No reira ua faaara ratou Ia'na. A feruri na i te mauruuru o te mau aposetolo ia Iesu a tia mai ai oia, no nia mai i to'na roi, e haamania ihora oia i te miti, e te mata'i, ma te parau rii, *A faaea, a mania.*

A feruri rii na tatou i te rahi o To'na faaroo, i tia'i Ia'na ia faaauraro i te mau mea natura mai teie te rahi. Ua mana'o anei outou i te faafaaea i te vero ma te parau rii, *A faaea, a mania?* E tia ia ia outou mai te mea e, e faaroo rahi to outou mai te faaroo o Iesu i te taime i rave ai oia i taua ohipa ra.

A hi'o tatou i te puairaa o te faaroo o te aposetolo ra o Petero i to'na haereraa na nia i te moana, mai tei parauhia i roto i te Mataio 14:29.

O te reira ia te ravea no te faaiteraa i to tatou puairaa, e a ore râ, to tatou paruparuraa i te Atua. A hi'o na tatou ia tatou iho, e a ani na ia tatou iho i te tahi mau uiraa. E na vai anei to tatou faaroo e tia'i ia faaorahia tatou, na roto a-

na'e i te faatiaiaraa'tu i te ahu o te taata mana, mai te vahine pohe ma'i mai tei parauhia i roto i te Mataio 9:20-22?

E faaroo anei to tatou mai to Daniela, a faaorahia'i oia i te mau liona? Te mana'o nei au e, e mea tia ia tatou ia parau e, aita. E a ore râ, e faaroo mai to na taata Hebera tei ho'i mai, no roto mai i te umu auahi tei ura noa, ma te mau uiui ore? E faito anei to tatou faaroo i to Noa ra, o tei haere e poro haere i te evanelia i na matahiti hoê hanere e maha ahuru, ma te mo'e ore te faaroo ia'na, no te faaora i to'na ana'e iho utuafare, e a ore râ, te faaroo o Ioba i to'na faaoromairaa i te mau fêfê rahi?

E tia anei ia tatou ia tuu i ta tatou iho tamaiti otahi i nia i te vahi i faaineinehia, no te pûpû ia'na ei tusia, mai ia Aburahama i rave i ta'na tamaiti, ia Isaaka, mai tei parauhia i roto i te Genese, pene 22? Ua mana'o vau e, ua iti roa te taata, i te ao nei, ma te faaroo mai te reira i te puairaa. No te aha? Teie ia te tumu, aita tatou e haapao nei i te ture a te Atua mai te mau taata i taua tau ra.

E faaroo anei to outou e, e noaa ta outou i'a ia haere outou i te tai'araa? E, e mea papu te reira ia outou, ahiri aita, aita ia outou i haere. Eaha te mea tei faatupu i to outou na feruriraa e, e roaa ia outou te i'a i te tai'araa? O te raveraa ia te reira o te faaroo. E tauturuhia tatou e te Atua mai te mea e, e ani tatou ma te aau haehaa e te faaroo rahi. E faaroo hoi to Iosepha Semita i te matahiti 1829, i farii ai oia i te parau mau no nia i te mau ekalesia, e i faaite-atoa-hia'i ia tatou e, te vai mau ra te Atua e ta'na Tamaiti, e ua ui oia ia raua e, *Tei hea te ekalesia mau i nia i to ao nei?* e ta raua faaiteraa mai e, *Aita te ekalesia mau i nia i te fenua nei*, no reira i faatiahia'i te Ekalesia a Iesu Mesia i te Feia Mo'a i te Man Mahana Hopea Nei.

Ua faatiahia anei ta tatou ekalesia ahiri e, aita to te peropbeta e faaroo? E, e faatiahia te ekalesia i te ao nei, ia itea ia'na te tabi taata tei ia'na te faaroo, mai te au i To'na hinaaro, ei aratai no to'na mau taata.

Ua ite tatou i te faaroo rahi o Iosepha Semita i to'na faaoromairaa i to'na hamani-ino-raa-hia, e i te hopea ua pohe

oia ei maratiri. Ua puai anei to tatou faaroo mai te reira te huru? No te aha? No te mea aita tatou i haapao i tei ia tatou i teie nei. Ua ite tatou i te aamu, i roto i te Mataio, pene 25, no te mau taleni. Te mau taata tei haapao i ta ratou taleni, ua maitai ia ratou, e te tahi, tei ore i haapao i ta'na taleni, e mea fifi roa ia, ua tuuhia oia i rapae.

Mai te reira te huru o to tatou faaroo. Ia haapao tatou i to tatou faaroo e horoahia mai te tahi taleni ia tatou.

Papaihia e Teina W. Haslem

I Te Matamua Ra

I VAI na te Logo i te matamua ra, i te Atua ra hoi te Logo, e o te Atua hoi te Logo. I te Atua ra hoi Oia i te matamua ra. Na'na i hamani i te mau mea atoa nei, aore roa e, e ere oia i te hoe mea i hamanihia.

O te mau taata atoa tei haere mai i teie nei ao, ua vai ratou i te ao varua, hou to ratou taeraa mai i teie nei ao, ei mau tamahine e ei mau tamarii tamaroa na te Atua. "E e metua hoi to tatou to te tino nei, o tei a'o mai ia tatou, e ua faaiti hoi tatou, eiaha ia rahi atu to tatou auraro i te metua o te varua nei, e ia ora'tu?" (Hebera 12:9)

Ua fanauhia Iesu i te ao varua, e o Iesu to tatou matahiao. Ua vai tatou i roto i te mau apooraa i faatiahia i tera'i ra. "I hea oe ia'u i haaman i te tumu o te fenua nei?" (Ioba 38:4) "Ua parau atura Iesu ia ratou, Amene, amene, e parau atu vau ia outou, Aita Aberahama i fanau, te vai nei au." (Ioane 8:58)

Ua oaoa tatou e ua himene tatou mai te puai, e ua himene atoa te tahi mau taata, i pihaiho ia tatou, i te taime o te faatumuraa i te ao nei. Ua oaoa ratou, e tatou atoa, no te mea ua ite tatou atoa i te opuaraa no to tatou taeraa mai i te ao nei, ma te tino tahuti, e te opuaraa no to tatou tiamâraa. Ua faaitohia mai te reira ia tatou, e te Atua, e ua oaoa roa tatou. "A fatu atoa'i te mau fetia poipoi i te himene, e ua pii noa te mau tamarii a te Atua i te oaoa." (Ioba 38:7) Te vai ra tatou i reira e ua hinaaro tatou i te rave i ta tatou tu faa ohipa no te opuaraa rahi, e ua na reira ihora. Tei roto tatou i te apooraa rahi, i te ra'i ra, i te taime o te tuuraa o Satane raua o Iesu i ta raua iho na opuaraa ei faaoraraa no te ao nei. Ua maitihia o Iesu, no te mea aita oia i hinaaro i te faaore i to tatou tiamâraa, e te reira ia te tumu i fariihia'i

ta Iesu opuaraa. E ua hinaaro Satane i te faaore i to tatou tiamâ e ia puto faahou i te mau taata atoa, no roto atu i to tatou huru, i te Basileia o te Atua, e no'na te mana hope, e te hanahana e a muri noa'tu, mai tei papaihia i roto i te Bibilia, "O to oe hoi mairi mai te ra'i mai, e Eilela, e te tamaiti a te poipoi e! o to oe hoi tâpûraahia i raro i te repo, e tei haavîvî i te mau fenua nei e! Ua parau ra oe i roto i to aau ra e, E haere au i nia roa i te ra'i ra, e e faateitei au i tau terono i nia'e i te mau fetia o te Atua ra; e parahi hoi au i nia i te mou'a amuiraa ra, i te pae i apatoa ra: e a'e â vau i nia'e i te mau ata ra; e ia faito vau i Tei Teitei ra. E hopoi-roa-hia râ oe i raro i te tanuraa ra, i te hiti roa o te apoo ra." (Isaia 14:12-15)

Ua ite tatou e, te tumu rahi no to tatou taeraa mai i teie ao, e vahi tamataraa ia. Ahiri e, ua riro Satane ei Fatu no te ao nei, aita ia e tia ia tatou ia maiti i te maitai, e a ore râ i te ino. No te mea aita i fariihia te opuaraa a Satane, ua orure ihora oia e ua hurihia oia i rapae, e ua pee te toru o te tufaa o te mau varua na muri ia'na. Ua pee te toea o te mau varua ia Iesu, o ratou ia te mau taata tei haere mai i teie nei ao, e tei roaa te tino tahuti, e o teie ia te mau taata te haere e tae noa'tu i te hopea o teie nei ao. No reira, ua haapao maitai tatou i taua tau ra. Nafea i teie tau, e i teie oraraa, e faarue anei tatou i te ohipa maitai tei haamatahia i reira?

Papaihia e Eledona Peterson

PARAU API NO TE MISIONI

Ua tae mai te parau api, no Taega mai, no te hoê vaa tei tahuri i te tere-raa na Nihiru i Taega. Ua faarue te hoê poti e na vaa e piti i Nihiru, i te hora ono e te'afa i te ahiahi, no te afairaa'tu i te hoê aiû tei pohe i taua mahana ra. I te hora ahuru e te afa i tahuri ai taua vaa nei, o Paparei to'na i'oa. Ua huru atea te poti i taua taime ra, no reira ua tere te mau taata no teie vaa ra i nia i te tahi vaa e tae noa'tu ua ho'i mai te poti e ua ravehia taua mau taata ra. O te ho'iraa ia o te poti i te vaa i huri, e te raveraa i te mau taihaa no nia i te reira. Ua fatata mai te fenua ra o Taega, e i te hora ono e te afa i tae atu ai ratou.

I te 2 no Tiunu i mairi a'enei, ua maitihia e ua faataahia o Tauapiti â Mariteragi ei papai parau no te Amaa i Papeete, ei mono ia Marcel Bonnet.

"Ua tae mai maua i Papeete nei, na nia ia Denise, i te 8 no Tiurai. Ua faaea maua i te Tuamotu no na ava'e e pae, i te farereiraa i te mau taata e i te pororaa i te evanelia, i Kaukura, Apataki, Niau, e Fakarava.

"Te hinaaro nei maua i te faaite atu i to maua mauruuru i to taua mau fenua ra no to maua faacaraa maitai i rotopu ia ratou, e no to ratou tautururaa mai ia maua.

"Ia haamaitai te Fatu ia ratou i to ratou imiraa i te parau mau e i te Evanelia a Iesu Mesia."

Etera Benson raua o Noromana Price

TE MAU PARAU API

Ia faaipoipohia na taata no te fenua Korea ra, ua opani-roa-hia te vahine ia paraparau, i ta'na tane, i te mahana matamua ra. E peu huru ê mau.

I roto i ta'na oriraa tama'i e ou'a te Maori no Niu Zelani i nia roa, e i reira e faatopa ia'na iho i nia i to'na na turi. Eiaha outou e tamata i te reira, maori râ, i nia i to outou mau ro'i.

Eaha te faito o te oura miti rahi a'e i roaa ia outou? Ua roaa a'enei te oura miti rahi roa a'e o te ao nei, i roto i te moana Atalanatica, e ua tae oia i te faito ra, hoê metera e e maha ahuru ma pae centimetera i te roa, mai te hopea o to'na na avae e tae noa'tu i te hopea o to'na aero.

Ua pohe te uri paari. I roto i na matahiti e 14 ra, ua apee noa te hoê uri i to'na fatu, oia hoi, te hoê orometua i roto i te hoê fare haapiiraa teitei. Ua varavara roa to raua taa-ê-raa. I te haamataraa ua haere noa raua no te tahi mau tere poto ra, e i muri iho ua tae raua i te mau vahi tatauraa no te Olympiade. E, i reira, haamata atura te uri i te haere i te fare haapiiraa, e to'na ra fatu, no te haapiiraa ia'na iho. Ua na ô mai taua orometua ra, e uri faahiahia mau oia, I te hopea, pohe roa'tura taua uri ra, no to'na ruau, e ua faaterehia te hoê pureraa i to'na tanuraahia.

E mea ohipa roa te patiri.—Ua faatupu faahou te patiri i te hoê ati huru ê roa—oia hoi, i teie taime ua haapurara oia i te hoê nânâ puaatoro. Puehu ê'atura te mau puaatoro a topa'i te patiri i ropu ia ratou e ua mo'e roa te tahi pae o ratou, e ua faaea te tahi pae e 20 kilometa i te atea ra. E mea rahi te ino ta te patiri e faatupu e te mau mea maere atoa hoi. Te ura nei te mau uru raau, e toru, e a ore râ, e maha tauatini taime i te uira, e te paapaa nei te mau fare faaapu e tae noa'tu i te faufaa ra e 800.000.000 farane i te mau matahiti atoa, e e pohe atoa ia'na e 500 taata i roto i taua area tau ra. Aita roa e taime no te aperiaa'tu i te patiri. No te oioi o to'na tere, eita roa e tia i te taata tei ũ i te reira, mai te mea e ora mai oia ra, ia ite i te reira, e a ore râ, ia faaroo atu.

I te matamua ra te vai ra te mau mana'o hape no nia i te tahi mau maa e amuhia e tatou nei, oia hoi, eiaha e amu i te i'a e te ũ i te hoê â tamaaraa; e mea titaubia ia amu te taata rave ohipa i te tufaa rahi ina'i, e eiaha roa te pape ia inuhia i te taime tamaaraa. I teie nei râ, na te mau haapiiraa paari i faaite mai ia tatou e, e mau parau haavare ana'e te reira.

I te hoê fenna, e mea hoo rahi a'e te mau poti ia ore ratou ia penihia i te peni. Te tumu o te reira, o teie ia, eita te mau feia hoo e ite faahou, ia penihia te poti, mai te mea aita anei e pona i roto i te mau iri papai ra.

Marcel Bonnet, Gérant

Ralph J. Richards, Éditeur de la Mission

Kenneth R. Stevens, Imprimeur

Neneihia e te MISIONI TAHITI no te Ekalesia a Iesu Mesia i te Feia Mo'a i te Mau Mahana Hopea Nei. Orovini, Papeete, Tahiti.

Te hoo: e 5 farane i te matahiti; e 10 farane no na matahiti e toru.